

Siunnersuummut nassuiaatit

## **Nassuiaatit nalinginnaasut**

### **1. Aallaqqaasiut**

Siunnersuut 2020-mut aningaasanut inatsit pillugu isumaqatigiisummi ilaatinneqarpoq.

ATV-nut il.il. motorinut akileraarutip 2.000 koruuninut appartinneqarnissaa UKA 2019/135-p suliarineqarnerata nalaani annertuumik taparserneqarpoq. Tamanna siunnersuummi matumani ilanngunneqarpoq.

Biilinit innaallagiartortunut, biilinit brintitortunut aammalu plug-in hybridbiilinit akitsuuseqartitsinngikkallernerup atuuffissaa 1. januar 2020 naasussaavoq, takuuk 2019-imut Aningaasanut inatsimmi kontunut pingaarnernut 24.11.10-mut aamma 24.11.11-mut oqaasertaliussaq.

Biilit innaallagiartortut, pingaartumillu plug-in hybridbiilit atugaanerata maannakkut pimoorussamik annertusiartupiloorpoq. Biilit innaallagiartortut aamma plug-in hybridbiilit, biilinit benziinatortunut aamma dieselitortunut sanilliullugu pissusiviusuni allatut qinigassaapput. Tamanna aamma biilinit innaallagiartortunik aamma plug-in hybridbiilinit eqqussisarnerup ineriartornerani takuneqarsinnaalereerpoq. Maannakkorpiaq biilit innaallagiartortut ukiumut 25-t aammalu plug-in hybridbiilit 100-t missaannik ukiumut amerlisarput. Ullumikkut biilit innaallagiartortut aamma plug-in hybridbiilit Kalaallit Nunaanni inuit biiliisa ataatsimut isigalugu 10 %-iisut amerlassuseqarput.

Motorinut akileraarutip akilernerneqarnissaanut piffissamut killissaliussap maannakkut kinguartinneqarnerata sunniutigisaanik, ulloq 1. april aamma 1. oktober ullut akiligassanngorfiisa kingorna, ilaasa akiliinissartik qaammatip 20-anut kinguartittarpaat, piffissami tassani akileraarutip akilernissaanut aningaasaateqanngissinnaasarlutik. Taamaattumik siunnersuutigineqarpoq akiliinissamut killissaliussaq sivitsorneqassasoq.

### **2. Siunnersuummi immikkoortut pingaarnertit**

Siunnersuutigineqarpoq ATV-nut il.il. akileraarut ukiumut 2.000 koruuninut appartinneqassasoq.

Tamatuma saniatigut siunnersuutigineqarpoq biilit innaallagiartortut, biilit brintimik ingerlatillit aamma plug-in hybridbiilit akileraaruserneqartalissasut, tassami biilit taakkua ullumikkut Nuummi kiisalu illoqarfinni anginerusuni pisariaqartumik attaveqatigiinnermi atugassaqarfiusuni allani biilinit nalinginnaasunut tunngatillugu allatut qinigassaammata. Siunnersuutigineqarpoq akileraarut ukiumut 6.554 koruuninut aalajangiunneqassasoq,

tamanna biilinu benzinatortunut aamma dieselitortunut akigitat appasinersaattut annertussuseqarluni.

Kiisalu motorinut akileraarutip akileraarnissaanut killiliussa ulloq 20. apriliimit ulloq 30. apriliimit aammalu 20. oktobarimit ulloq 31. oktobarimit kinguartinneqassasoq. Taamaaliornikkut kingusinaarluni akiliinerup malitsigisaanik akilinngitsuukkannik akiitsoqalersinnaaneq aarlerinaateqannginnerulissaaq.

<b>Inatsisissatut siunnersuut inatsimmu atuuttumut sanilliullugu</b>	
Oqaasertai atuuttut	Inatsisissatut siunnersuut
	<b>§ 1</b>  Qamutit motorillit akileraarutaat pillugit Inatsisartut inatsisissaat nr. 3, 16. juni 1987-imeersumi, kingullermik qamutit motorillit akileraarutaat pillugit Inatsisartut inatsisaata allanngortinneqarnera pillugu Inatsisartut inatsisaanni nr. 10, 3. december 2012-imeersumi allanngortinneqartumi, makkua allanngortinneqarput:
<p><b>§ 2.</b> Akileraarutit ukiumut angissuseqarput:</p> <p>1) Qamutit motorillit 1.000 kg-t angullugit oqimaassusillit: kr. 6.554.</p> <p>2) Qamutit motorillit 1.001 kg-niit 1.200 kg-t angullugit oqimaassusillit: kr. 10.049.</p> <p>3) Qamutit motorillit 1.201 kg-niit 1.500 kg-t angullugit oqimaassusillit: kr. 10.747.</p> <p>4) Qamutit motorillit 1.501 kg-niit 1.800 kg-t angullugit oqimaassusillit: kr. 15.231.</p> <p>5) Qamutit motorillit 1.800 kg sinnerlugit oqimaassusillit: kr. 17.575.</p> <p>6) Motorcykelit: kr. 3.540.</p>	<p><b>1.</b> § 2, imm. 1, imatut oqaasertalerneqarpoq: ””<b>§ 2.</b> Akileraarutit ukiumut annertussuseqassapput:</p> <p>1) Qamutit motorillit 1.000 kg-t angullugit oqimaassusillit: kr. 6.554.</p> <p>2) Qamutit motorillit 1.001 kg-niit 1.200 kg-t angullugit oqimaassusillit: kr. 10.049.</p> <p>3) Qamutit motorillit 1.201 kg-niit 1.500 kg-t angullugit oqimaassusillit: kr. 10.747.</p> <p>4) Qamutit motorillit 1.501 kg-niit 1.800 kg-t angullugit oqimaassusillit: kr. 15.231.</p> <p>5) Qamutit motorillit 1.800 kg sinnerlugit oqimaassusillit: kr. 17.575.</p> <p>6) Motorcykelit: kr. 3.540.</p> <p>7) Qamutit motorillit nunakoorutit minnerusut sisamanik amerlanernilluunniit assakaasullit: kr. 2000.”</p>
	<p><b>2.</b> § 2-imi imm. 2-tut <i>nutaatut</i> ilanngunneqarpoq: ”Imm. 2. Qamutinut motorilinnut, taamaallaat innaallagissamik imaluunniit brintimik ingerlateqartunut, kiisalu plug-in-hybridbiilinu, batterinik innaallagissamik immeqqinneqarsinnaasunik ingerlatilinnut akileraarut ukiumut kr. 6.554-inik annertussuseqarpoq.”</p>

	Imm. 2-4 tamatuma kingorna imm. 3-5-nngorput.
<i>Imm. 2.</i> Akileraarutit, ukioq affakkaarlugu siumut akilernerqartartussat 1. april aamma 1. oktober akiligassanngortassapput, piffissaagallartillugu akiliiffissaq tassaalluni qaammammi akiliiffissami ullut 20-issaat. Piffissaagallartillugu akiliiffissaq nalliuttuuppat arfininngornerulluunnit akiliiffissaq ulluinnarmut tullermut kinguartinneqassaaq.	<b>3.</b> § 2, <i>imm. 2</i> , imm. 3-nngortoq, imatut oqaasertalerneqarpoq:” <i>Imm. 3.</i> Akileraarut siumoortumik ukiup affakkaarlugu akilernerqartartoq, ulloq 1. april aamma 1. oktober akiligassanngortarpoq aammalu kingusinnerpaamik ulloq 30. april aamma 31. oktober akilernerqassalluni. Piffissaq eqqorlugu akiliiffissaq ulloq kingulleq arfininngorneruppat, sapaataappat imaluunniit nalliuttuuppat, piffissamut killiliussat ulluinnarmut tullermut sivitsorneqassaaq.”
	<b>§ 2</b>
	Inatsisartut inatsisaat ulloq 1. januar 2020 atuutilerpoq aammalu siullermeertumik piffissamut akileraaruteqarfiusussamut 1. april 2020-mit 30. september 2020-mut, akileraarutip ulloq 1. april 2020 akiligassanngorfiani, atuutissalluni, taamaattoq takuuk imm. 2. <i>Imm. 2.</i> Nr. 1-imi aalajangersagaq ulloq 1. januar 2021 atuutilerpoq aammalu siullermeertumik piffissamut akileraaruteqarfiusussamut 1. april 2021-miit 30. september 2021-mut, akileraarutip ulloq 1. april 2021 akiligassanngorfiani, atuutissalluni.

### **3. Pisortanut aningaasaqarnikkut allaffissornikkullu sunniutaasussat**

Biilinut innaallagiaetortunut aamma hybrid-pluginbiilinut motorinut akileraarummit isertitat 2020-mi 2,6 mio. koruuninik, 2021-mi 3,9 mio. koruuninik, 2022-mi 5,2 mio. koruuninik aamma 2023-mi 6,5 mio. koruuninik iluanaaruteqarfiunerussasut naatsorsuutigineqarpoq.

ATV-nut akileraarutip annikillisinneqarnerani 2021 aallarnerfigalugu 1,5 mio. koruunit missaannik iluanaarutit annikillissasut missiliorneqarpoq.

### **4. Inuussutissarsiortunut aningaasaqarnikkut allaffissornikkullu sunniutaasussat**

ATV-nut akileraarutip annikillisinneqarnerata kingunerisanik inuussutissarsiortut namminersortut inuussutissarsiormut atugassaminnik ATV-nik piginnittut ukiumut kr. 4.554-nik sipaaruteqassapput. Inuussutissarsiortut akileraarutit akiliutillu ingerlatsinermut aningaasartuutitut ilanngaatigisinnaammattigit, akitsuutininik appartitsineq tassunga atatillugu tamakkiisumik sunniutissanngilaq.

Siunnersuut inuussutissarsiortunut taamaallaat innaallagissamik imaluunniit brintimik ingerlatilinnik biileqartunut kiisalu plug-in hybridbiileqartunut aningaasaqarnikkut sunniuteqassaaq, tassami taakkua maannakkut motorinut akileraarummik akiliisalissammata. Inuussutissarsiortut akileraarutit akiliutillu ingerlatsinermut aningaasartuutitut ilanngaatisinnaammatigit, akitsuutinik appartitsineq tassunga atatillugu tamakkiisumik sunniutissanngilaq.

#### **5. Avatangiisinut, pinngortitamut inuillu peqqissusaannut sunniutaasussat**

ATV-nut il.il. akileraarutip appartinneqarnerata malitsigisaanik taamaattunik qamutininik pigisaqalersut amerlanerulissasut naatsorsuutigineqarpoq, taamatullu ukiup annertunersaani qamutininik atuisut amerlanerulissasut naatsorsuutigineqarpoq.

Ilaatigut biilininik innaallagiartortunik piginnittut ingerlatsinermut aningaasartuuteqarnerulernerannik siunnersuut malitseqassaaq, tamannalu tuniniaanermut sunniuteqarsinnaavoq, aammalu biilininik nalinginnaasunik eqqussisarnerup annertusiartorneranik kinguneqarsinnaalluni, tamatuma malitsigisaanik pujoralannik ajoqusiisartunik aniatitsinerup annertusinissaa aarlerinaateqarluni. Maannakkorpiaq ukiumut biilininik innaallagiartortunik ikittuinnarnik eqqussisoqartarnera eqqarsaatigalugu, pujoralannik ajoqusiisartunik aniatitsinerup annertusiartorsinnaanera annikitsuinnaassaaq.

Plug-in hybridbiilinit motorinut akitsuusiisarnerup atuutsinneqalernerani plug-in hybridbiilininik atuisarneq annikillisinneqassasoq naatsorsuutigineqarpoq. Maannakkorpiaq plug-in hybridbiilit avatangiisinut iluaqutaasunik piginnaasaqavinnera nalorninarpoq, taamaattumik pujoralannik ajoqusiisartunik aniatitsinermut siunnersuutip pingaaruteqarnera taamatuttaaq eqqoriaruminaalluni.

#### **6. Innuttaasunut sunniutaasussat**

Innuttaasut maannamut akileraarusigaanngitsunik qamutininik motorilinnik peqarsimasut, Inatsisartut inatsisaata atuutilernerani ukiumut 6.554 koruuninik akileraarummik akiliisalissapput.

Innuttaasut ATV-nik il.il. peqalertut ukiumut 4.554 koruunit tikillugit sipaaruteqassapput.

#### **7. Sunniutaasussat allat annertuut**

Siunnersuut allanik annertuunik sunniuteqartussatut isigineqanngilaq.

#### **8. Oqartussanut kattuffinnullu i.il. tusarniaaneq**

Siunnersuut tusarniaassutigineqanngilaq, taanna aningaasanut inatsimmut isumaqatigiissummut ataqatigiissillugu suliarineqarmat.

## **Siunnersuummi aalajangersakkanut ataasiakkaanut nassuiaatit**

### *§ 1-imut*

Nr. 1-imut

§ 2, imm. 1, nr. 1-6, allangortinnagit ingerlateqqinneqarput.

Aalajangersakkami nr. 7 nutaajuvoq. Tassani siunnersuutigineqarpoq ATV-nut il.il. ukiumut akileraarut 2.000 koruuninut annikillisinneqassasoq.

Nr. 2-mut

Siunnersuutigineqarpoq biilit taamaallaat innaallagissamik imaluunniit brintimik ingerlatillit kiisalu plug-in hybridbiilit, 6.554 koruuninik ukiumut akileraaruserneqassasut.

Nr. 3-mut

Motoorinut akileraarutip akilerneqarnissaanut piffissamut killiliussaq ulloq 20. apriliimit ulloq 30. apriliimit aammalu 20. oktobarimit ulloq 31. oktobarimut kinguartinneqassasoq.

### *§ 2-mut*

Siunnersuutigineqarpoq Inatsisartut inatsisaat ulloq 1. januar 2020 atuutilissasoq, akileraarutit annertussusaat pillugu siunnersuummi nr. 1 aatsaat 1. januar 2021 atuutilissalluni.